





條議三字原多行

王穉玉文集卷七

條議

條陳朔方討逆三策

臨海王

亮穉玉撰

書

嘉慶天

檄到寧夏倡亂選兵應援職已先期令中軍官吳繼祖  
統兵二千馳赴中衛矣竊計叛眾起於倉卒未有深謀  
家丁半係虜人難以力取職愚敢獻三策上祈採擇焉  
一曰行反間夫噶拜父子希冀非望為日已久今承恩  
外出老噶居中此正平日姦計也及至戕巡撫囚總戎  
戮監司攻城堡輒推劉東陽為主夫東陽一總哨也彼  
豈甘心出其下哉彼以為事成則為元昊不成則委罪



東陽以說焉此不過以劉為犧牲耳顧東陽平日頗得衆心虜丁知有二噎漢丁實附東陽此其機可圖也以職料之非噎殺劉即劉殺噎無兩全理第需時日耳誠不惜捐金先間噎拜令殺東陽即不令封侯之賞且其婿土文秀頗有內向意是又一機括也又密令漢丁諭東陽以噎土携貳意以攻其心則有相仇敵我師可不戰而成功矣二曰造雲樓夫行間者攻心伐謀策之上也第狡賊志不在小一侯封不足以動之當為必勝之具庶保萬全聞我師逼城壕而賊人從高下矢石銳卒無敢近者謹按兵書中有雲樓之製用大木四根高城

數尺中鋪數板下以車輪四箇乘之外用牛皮包裹以避銳砲雲梯一以便登城中藏二十人各執短刀下以三百人推之造成雲樓四十具中可藏死士八百人遇夜令選兵一萬囊土塞壕推樓附城執兵者先越堞眼殺守堞者而推車三百人由雲梯接連登陟東西南北處處登城樓與城平矢石無措賊必驚潰此決勝之畫也靜虜松山多大木採運之費職任之矣三曰用水攻夫行反間則彼之心攜造雲樓則我之氣銳計無弗勝者倘曠日持久我兵已疲彼志未決將若之何考之朔方北倚賀蘭南臨黃河中特窪下引水灌田遂成沃今



今宜於上流築坝壅河水以灌城壕又于城外築土塼圍之秋深漲溢水至丈餘城且崩塌矣城門盡閉薪水不通百萬之衆坐而餓死即呼劉不相殘賊也城中軍民其能甘心待斃哉吾且多用間說以離叛賊之黨密布降帖以收居民之心無論各衛軍伍受國厚恩將圖報效即呼劉二孽計出無聊必相屠戮矣萬一負固不服則吾令萬衆乘梯多執掀掀多鑿城眼水一入城玉石俱焚矣何慮么麼群醜哉此萬不得已之計未可輕試也伏候 裁酌施行社稷幸甚職愚幸甚

安邊末議

陝西苑馬寺帶管分巡關道少卿兼按察司僉事王亮呈為條陳安邊微畫以仰資淵岳事職海東鄙人迂愚寡識妄希先哲涉獵群書旁及鞞鈴奇甲亦竊窺之自惟世受 國恩冀得一試以報。主上耳六載縣令叨授兵垣倡大義以白劉臺之冤劾奸党以清科場之弊請從祀以重王文成之學術明忠直以援鄒元標之貶竄致忤執政劣轉圜員八載于茲矣職之初至靖虜也當悍軍鼓噪之後虜帳越河而駐牧焉職捐俸賑飢臨巢驅虜民夷安堵邊烽不燃臨洮之亂督兵應援斬獲宰僧党不能等首級九顆出郭僉事于重圍救全和政



驛景古城等三堡拯劉總戎于虜陣按院叙功奉旨  
紀錄隨奉各部院明文監軍勘邊督造兇火器職備歷  
諸邊直登耳記議修水洞議築臺造全盔甲萬餘火  
車四百輛軍火器械數萬計俱解河州聽用經略叙功  
奉旨優叙朔方之叛職奉文計送條陳行反間造雲樓  
用水攻三策總督魏頗嘉納焉仍選士二千先取中衛  
擒縛王虎乘勝連復七堡直至玉泉賊遂遁回鎮城不  
敢離其巢穴矣職又計擒劉向陽劉景陽等鄉解獻俘  
又造完藥八千觔焰硝二萬觔煤炒二百五十石小麥  
三百石弓箭鎗砲數千計俱運至軍前聽用軍門叙功

奉旨優賞此職之効勞于塞上者梗槩如此也他若  
積餘糧絕交際裁門稅革虛夫皆詳允在卷此士人之  
常行耳獨奈何隣壤僚友忌功懷疑謗甚鏢金機深偃  
月萬里孤臣誰可控籲茲者藉庇幸全不敢復啟口言  
疆場事矣職徐思之蓋臣謀國不計其言之行與否也  
策士疇邊不必其功之自己出也矧遭際明欣逢知遇  
有懷不吐更何待焉謹以足跡所到機會可乘者列款  
條為十事上陳伏祈俯賜採擇施行職愚幸甚邊疆幸  
甚



一曰權勦撫以寓機夫制禦之要勦與撫而已顧操  
縱之間有權存焉握其機而神運之安知撫之不  
勦也又安知勦之不為撫也即如榆林之款向非  
勦也彼其能就羈勒乎湟中之勝倘非撫也彼其  
能入牢籠乎職奉文中馬前至西寧聞詢邊略聞  
火酋扣關求款者屢矣道將未敢言也職愚以為  
許之便曩者洮河之亂豈盡火酋之罪哉當事者  
欲寬順義之罰以便結局姑以一會當之耳况連  
歲西犁其穴中國之威已伸矣乃今搖尾乞憐則  
因而收之無不可者倘使悔過自戢我復何求脫

也不然則觀釁而動亦制敵一奇也兵志曰兵詭  
道也所謂動于九天之上者言其不可測也伏候  
台裁

二曰創逆酋以威全套夫松山諸虜陽順陰逆其中  
最傑驚難制者宰僧着力兔是也往歲呼劉之亂  
二酋冀之致屋西顧奉 青草賞以矣歲歲大肆  
鷓鴣搶中衛靖虜殆無寧日茲秋乞款莊浪未幾何  
而涉井間又入掠矣職思以為不大創之夷禍終  
未厭也况我兵屢勝虜氣已奪套夷新款松巢益  
孤宜候來歲春冰初泮塞草萌馬畜瘦損角弓濕



潤虜之長技失矣乃檄中衛叅遊以驍騎搗其東蘭河  
大將以精兵搗其西固原靖虜以全軍鼓棹而往人齎  
十日之糧必得全捷焉便檄榆林集重兵于賀蘭之北  
莊涼伏選甲于鎮羌之旁遙為聲援且防奔突縱不能  
盡清巢穴亦可以大挫虜鋒矣伏候台裁

三日復廢堡以完舊疆職任靖虜時曾陳鎖黃川建堡  
之議隨蒙軍門行固寧二道會勘未果今三堡已脩  
隘險可守矣顧自迭烈遜河二舍許有鎖罕兔舊址  
邊墻墩臺踪跡猶存西至莊浪八十里耳成化間守  
備內臣受賄妄言遂棄而不守乃令會寧四里金縣

三里之民没入于左衽矣虜未款貢礦洞尚開路  
吳二總兵家種植稻田獲厚利焉盡中國之隙地  
虜人不敢垂涎而駐牧也邇年以來諸酋盤據其  
間鳥蘭一水之外皆羸幕矣可勝嘆哉職愚以為  
宜乘創虜之後屯集重兵修復廢堡直數月之勞  
耳而舊疆可完四鎮聯絡其為形勝莫大於此說  
者曰守之難也兵食不繼也不知鎖罕兔既築則  
蘭靖莊浪皆為腹裏而平灘堡一條城紅古城前  
馬灣皆可無設矣莊靖二營可撤兵馬之半以新  
城矣惟修邊築隘費數萬金耳夫捐數萬金之費



以克復二百年之舊疆

聖天子必無吝也獨奈何捨百餘里之徑而守千餘里之迂耶記曰非常之原懼人馬及臻厥成天下晏如也此之謂矣伏候台裁

四曰召礦兵以據虜腹職靖靖虜河外四十里有剪金山者中有礦洞蓋利窟也山有洞穴路通一線可據而守往歲蘭靖數千人結屋其間以取礦利邊民多富庶焉乃此輩皆健兒精甲虜極畏之自蘭州一將官妄求增稅不滿其欲遂建言于軍門高處乃擒礦徒塞洞穴是為敵人去腹心之疾也

不亦左乎職奉委監軍時曾召礦兵六百人其名籍尚在蘭州可查也今宜增募二千餘各立旗甲之類以統率之就礦為糧不徵其稅止聽調遣為我聲援虜倘結聚則張疑以解散之虜若入犯則刦帳以牽制之仍于迭烈遜一條城平灘堡等處多開集場接濟穀粟則道路既闢虜帳自遠矣是不不費斗糧而坐得壯士之用深據虜腹而敵懷內顧之憂且可以招捩金會之遺民屯種蘆塘之沃土有富强之寔無嘯聚之虞策莫善於此者廢堡既築礦洞復開則松套自清奇功立建矣伏候



台裁

五日廓歸德以制兩川夫莽控二川古潘州地也我朝雖未設郡縣而番漢堡塞遐邇相聯屬番屯牧其間為我屏蔽脩禦周矣近因款貢火真等會渡河郡聚窺我虛實乘間入犯洮河之間幾荼毒焉乃歸德保安實要害也與其守之於堂奧孰若禦之于門庭乎今宜于歸德添一叅將增兵三千人保安添一守脩增兵一千人令自為守虜若大舉則堅壁自完不許輕動虜若零搶則合營堵截毋敢畏避春初馬弱則相機搗巢勅虜入犯則乘虛

劫帳各會住牧則鼓番偷馬遇夜張疑令渠驚畏不得安寢虜將自退矣此不戰屈人之術也每歲中馬即于歸德招採採遠番不拘定額儘給二堡戰士以便騎征則一舉而撫番却虜兼得之矣伏候台裁

六日復番站以固藩籬夫自土門以至歸德蓋四百餘里耳中有豈臺八角且龍康城諸堡蓋相聯絡焉其故址尚在也歸德倘屯重兵則虜騎不敢馳騁乃乘其暇隙脩築諸堡安插各番人自為守有警則烽火相接洮河歸保首尾應援無事則且耕



陽字疑有脫字或  
脫順字 森記

且畜以馬易茶明我耳目即番族之陽陰逆者亦  
許其自新不追其既往仍嚴禁將吏科索番貨者  
以軍法重處不少貸焉且聽其射獵寬其文網則  
數年之間生聚既衆番人皆吾人矣伏候台裁  
七曰做屯田以備芻餉漢臣趙充國屯田湟中以制  
西羌兩川其故地也職查歸德左右二十里間番  
漢以墾闢猶瘠土三十里外則一望沃壤清泉茂  
草開渠濬井在在可居引水灌田盡成佳植獨奈  
何棄之以資敵也宜下令諸軍隨地墾闢永不起  
科或立小堡以便屯聚或給牛種以資耕犁此可

者字下疑有謂字  
森記

次第舉之耳說者虜騎紛擾何暇治田乎不知虜  
之結聚有時我之偵探宜預况我之衛所數百甲  
士也結隊而往列營而耘大舉則守之零騎則勦  
之無不可者先開歸保漸闢兩川得寸則寸也得  
尺則尺也遲之數年食足兵強儼然雄鎮矣伏候  
台裁

八曰議無制以免推諉夫歸德之設將添兵此策也  
人人能道之矣乃猶豫未決者則以運餉之難也  
應募之寡也職愚以為不然嘗閱其地圖去西寧  
百餘里耳湟中川原平行穀粟屢登稍裒其直令



運至歸保人自願之即官給車價亦未為難也况  
莊浪之魯西寧之李土兵不下萬人厚其資糧自  
當應募即不然者令二家各選銳士千餘月給餉  
銀一兩盛甲芻草亦在中不出出數月間營伍可  
充戰守俱裕矣但宜于西寧兵備勅書內添兼制  
歸德字樣止令其選兵運餉而信地之守禦無與  
焉歸德叅將勅書內添應援西寧字樣責任亦如  
之則兩河共為犄角聲勢益重兵食更相接濟而  
夷氛自消矣伏候台裁

九日練地軍以資戰守職奉文選兵平涼之土達地

軍蓋三千有奇其膂力強壯弓馬熟閑者蓋相半  
焉其中倣飛健兒恨不得一當以自表豎者未嘗  
乏人乃往時率以為無用而姑置之其故何哉訓  
練無素鈐轄未專也况此輩夷種也輕生敢戰踰  
于漢人且自備鞍馬均知愛惜與營軍之侵尅草  
料坐視其肥瘠者蓋相懸矣職愚以為平涼宜添  
一守備專管土達地軍自二月以至六月常川練  
而本道月一課其殿最焉除防秋已支糧草外自  
仲春以至季夏每月給銀三錢以備芻餉歲不過  
增數千金耳仍量備操賞銀兩以為激勸之資則



練之數年合營俱堪禦侮而固鎮之軍聲益張矣  
倘以為設一守備費且不貲焉則于該衛武弁中  
擇其驍勇廉幹者畀以名色俟有成勩超格陞用  
則赳赳勇夫誰無敵愾之想哉伏候台裁

十曰議宗祿以塞亂源夫平涼之宗室一千六百有  
奇其應支祿糧則九千餘兩矣近議允支誠為妥  
便仍半兌平涼半支西鳳以致頭緒既繁弊竇亦  
夥各宗影射拖負吏書因緣為奸獄訟滋章怨讟  
竝作職此之由也職愚以為平涼土瘠民貧額賦  
歲多逋欠西鳳漢中民豐地沃征輸不至逾期今

宜以韓藩宗祿儘兌平涼等縣不必更為追呼其  
各府之應解宗祿者改邊餉依期完納則一轉移  
之間而瘠郡省鞭朴之苦軍儲無征解之難而各  
宗亦懽然相安無復喧囂之患矣此職詢之諸宗  
并閣都大夫士靡弗稱便者蓋兩利也伏候台裁

### 西陲効勞略節

原任陝西苑馬寺少卿帶管分巡關道兼按察司僉事  
今聽降用王亮為萬里孤臣執法被謗乞賜昭雪以明  
公道事職亮海東鯁生也垂髫向學雅慕前修涉獵群  
書頗明奇甲庚午讀書武林與憲友王士性鍾化民輩



講學于天真書院主之者陳我渡先生也丁丑通籍京  
華與同年鄒元標沈懋學輩講學于白塔寺中主之者  
劉白川先生也癸酉亮叻中鄉試丁丑舉進士是歲授  
官進賢知縣積穀萬餘兩蒙諭獎奉吏部明文發賑  
濟錢糧三千釋冤獄二十餘人同年臺臣鄒元標言事  
謫戍職遣人往候其母時分俸金為薪水資原任御史  
劉臺之被誣也職往見同年推官丘度令渠保護幹旋  
劉公父子極感服焉吉安老儒梁汝轄以詩投張居正  
勸其守制居正憤嫉托事擒之道出進賢職手釋其縛  
贈以輿夫巡撫劉斯潔激節嘆賞比入楚郭御史遂斃

之杖下矣此江右人人所共聞也而一時兩院俱係江  
陵之黨怒職立異欲甘心焉幸而豫章大夫士合口維  
持始免擯斥縣令六載居正謝世局面一更職方叻行  
取選授兵科給事中首疏祛江陵弊政請復王文成書  
院學田并請從祀孔廟疏陳邊防十事請招板升以携  
虜黨請減贖鍰以甦疲民又疏論湖廣巡按郭思極科  
場作弊中張居正之子少卿張彥場中代筆驟躋清華  
一集又疏論稱鄒元標黃道瞻之貶謫曾乾亨孫繼先  
孟一脉馬景隆范雋輩之斥逐既奉諭旨而二執政  
皆張郎座主也遂因同年丁御史疏論高啟愚戴光啟



等疑職使之徑擬稟旨謂職妄言生事不時議處以清  
言路而許相國復上一疏謂職倡為科舉之說以鼓惑  
天下之人心不俟年例轉職湖廣僉事矣一麾楚梟雌  
伏林莽四年職因父病疏求侍養歸省數月守制家居  
京察時執政欲盡建言諸臣奸黨馬允登攘臂稱首幸  
而御史王國昌言排之倖留出補西蜀復除四川僉事  
定驛傳之夫額而冒濫頓清減威茂之糧價而官軍無  
累調陳臚之功罪清草茶鹽之積弊代署巡道辯釋冤  
獄數十餘命詳讞叅酌求其生而得之夜必焚香告于  
天曰今日又活一人矣御史何倬欲舉職卓異偶主事

臚下原有乃字臚  
乃字臚

舊職是舊職  
三語

饒伸復言科舉事奸黨謂職曾任進賢與伸舊職疑職  
千里移書也因職曩時倡大義以白劉臺之冤劾奸黨  
以清科場之弊請從祀以重王文成之學術明忠直以  
援鄒元標之貶竄致忤執政而楊冢宰阿當路旨轉職  
苑馬寺少卿管靜虜兵糧道事是時秦中荒甚官軍鼓  
噪虜帳越河甚難為吳友人副使余獻來謂職曰丈夫  
榮達有時吾儕進退唯命出處之際兄宜思之職詢之  
于按察使蔡國珍國珍語職曰人且事君夷險如一爾  
建言時曾計顯晦耶豈以劣轉遂悻悻乎職聞之悚焉  
即日就道贖鍰一千餘兩分毫不用造冊交與署道副



使郭子章今見任貴州巡撫可問也馳至平涼詢鼓噪之故曰米價騰湧耳乃預支苑寺俸薪二百兩買米六百石運至靜虜賑濟飢民軍心遂安親帥叅將吳廷栢等前至虜營諭以德威各虜悉眾回巢燧燧無警即賓着二酋亦感恩懷德不忍欺焉虜犯臨洮倡亂職選精兵五千先差中軍官指揮吳繼祖等前往應援是時虜因僉事郭宗賢于孤堡中二日職隨統兵至寧夏斬獲火落赤女婿宰僧党不能等首級九顆餘虜首級八顆銳砲打死者無算賊人驚潰而郭僉事夜走臨洮得免焉幸我兵奮勇出郭宗賢于重圍救全和政驛景古城

等三堡拯劉總戎于虜陣按院叙功奉

旨紀錄此時

職轉苑司居虜虜又二年矣獨奈何隣壤僚友忌功懷

疑謗甚職遂為忌者所中誑疏奉

旨復左遷職福建

都轉運鹽使司運副使職至三山巉署履任以來例規

二千餘金悉行裁省弊竇甚夥刻意振刷祈無愧于性

心亦以塞讒間之口耳職居閩二年年寸衷未白雄心

尚存俛首鹽官猶慮按劍幸在朝同僚時常捧書甲慰

職雖伏櫪鹽車亦能仁氏所謂隨緣耳一切功名置之

度外矣邇來謳吟慨慷頗有自得處好事馬生彙職詩

文為一部付之梓人幸得同年太史公椽筆并諸首簡



可藉不朽耳聞廟堂諸老頗有為職扼腕者幸温大中  
丞疏中所稱清苦異常者蓋謂職也鄒爾瞻曾為職致  
書太宰得其報音足下旦暮入都無俟鄙言矣未候逾  
數日奉 旨轉職原任苑馬寺少卿兼管靖虜兵糧道  
事并賜 勅書命職整肅湖廣陝西廣東及所屬該管  
各等處聽爾調遣倘有各該官員巡哨軍民人等有哨  
報稽遲違令誤事者聽爾以軍法處治等勅職隨奉  
諭旨轉至靖虜鄭尚書以職為能委職督造火器職備  
歷諸邊直登耳記議脩水洞議築豈臺議脩邊隘數處  
造完盔甲萬餘火車四百輛軍火器械數萬計俱解河

州聽用經略叙功奉 旨優叙朔方之叛職奉文討逆  
條陳行反間造雲樓用水攻呈三策 總督魏頗嘉納  
焉職又擒劉向陽劉景陽等綁解獻俘又造完火藥八  
百觔焰硝二萬觔煤炒二百五十石小麥三百石弓箭  
鎗砲數千計造完軍器俱貯公所運至軍前聽用軍門  
叙功奉 旨優賞此職之効勞于塞上者梗槩如此也  
此時營無絲粒軍門差旗牌官催急運糧無濟乃發小  
麥三百石遍給衛中軍民令家備煤炒二斗一晝夜完  
煤炒四百石職用小舟二十隻裝載順河而下每舟用  
兵只二十人扯之越明遂達朔方每軍一名付小麥一



斗萬眾歡心如雷逆徒氣奪虜亦懷德當事雖多嫉妬  
茲幸賴 聖天子命職勅書得以籍忌者之口亦得以  
伸孤臣之志也職思之遭際明時有懷不吐更何待焉  
謹以足跡所到機會可乘者列欵條為十事上陳伏祈  
俯賜採擇焉一曰權勦撫以寓圓機二曰創造會以用  
水攻三曰復廢堡以完舊疆四曰召曠兵以據虜腹五  
曰廓歸德以制西川六曰復番站以固藩籬七曰倣屯  
田以脩芻餉八曰議魚制以免推諉九曰練地軍以資  
戰守十曰議宗祿以塞亂源職已劣轉圜員八載于茲  
矣職思前日戕巡撫因總戎戮監司攻城堡輒推劉東

陽為主夫東一總哨也彼以為事成則為元昊不成則  
委罪此不過以劉為犧牲耳顧東陽平日頗得眾心虜  
兵知有二噓漢丁寔附東陽密令虜漢致令自相攻殺  
此其機可圖也又造雲樓高城數尺中鋪板下以車輪  
乘之以便登城樓與城平矢石無措賊必驚潰再用水  
攻黃河中特窪下築堤壅河水以灌城壕又于城外築  
土柵圍之秋深漲溢水至百丈餘城且崩塌矣城門盡  
閉薪水不通百萬之眾坐而餓死即劉噓不相殘賊也  
城中軍民其能甘心待斃哉萬一負固不服則吾令萬  
乘桴多執楸楬多鑿城眼水一入城玉石俱焚矣何慮



小小群醜哉况今連歲而犁其穴又命我兵列陣不動  
吳繼祖領兵一千至逆城困圍就西安兵合營焉虜犯  
懼怯退離隘道屬地方二十里耳職帥親兵五百人屯  
駐葫麻嶺上搖旗放砲張疑設伏虜不敢犯撫院趙提  
兵應援馳至安定亦以職為能此時賊人之胆已喪中  
國之威已伸職奉監軍會議竟用職策引水灌城死者  
無數生者屈服職帥兵一千由雲梯接連入城餘党盡  
行勦滅安撫兵民大賞三軍已畢整頓數月職同諸將  
士凱歌還朝 聖天子臨軒進呈御覽錄功臣逐一陞  
賞職蒙 皇上嘉獎進爵是時職頭顱盡白望在朝諸  
同年與職莫逆者悉行解組歸田職遂有志林下未逾  
時輒上一疏蒙 朝廷准職還鄉遂得優游故里與二  
三同志者共譚晨夕頗清閑自得此時職居秦關已十  
載矣因自叙生平大略備嘗艱苦云爾



王穉玉文集卷八

臨海王 亮樓峰撰

祭文

祭國學生靜庵馮公文

維萬曆十有九年歲次辛卯四月癸巳朔越十二日丁未 欽差整飭靖虜兵糧道陝西苑馬寺少卿兼按察司僉事姻家教弟王亮謹以牲醴庶羞之儀致祭于明故太國生老親翁靜庵馮老先生之靈曰嗟惟我翁秀靈所鍾金玉其度圭璧其躬早耽藝苑隨入璧雍士林望重石鼓聲洪展親孝友接物謙恭言坊行表克振宗風方期難老純嘏爾崇胡天不弔駕鶴華嵩某叨至戚追慕芳蹤誼雖有盡情則無窮虔修牲醴畧展私衷神其不昧陟降如逢尚饗

祭大學士水瀛潘公文

維萬曆十九年歲次庚寅十二月朔越十六日 欽差整飭靖虜兵糧道陝西苑馬寺少卿兼提刑按察司僉事眷晚生王亮謹以剛鬣柔毛之奠致祭于 明故武英殿大學士太子太保禮部尚書瀛翁潘老先生之靈曰惟靈河陽華胄刻水名宗文誇紫豹句擅雕龍矯矯玉立翩翩蕙風弱冠鼎甲視草清宮靈篇瑞圖墨妙筆



精在帝左右哀然國能木天密勿金馬從容司成兩畿  
譽髦景從晉位宗伯瑞錦崢嶸解組歸來綠野危踪  
帝眷元老蒲馭敦迎參贊璿機啟沃宸聰絲簧投杼鄴  
寄蹤丹宸屬望赤舄可逢云胡一疾騎箕遙空亮忝後  
學久荷旃幪頃緣息射雀錦屏兔絲縈蘿蕙葭倚瓊望  
翁上壽喬佺偓松昊天不弔我心則恫羈宦天末執祿  
莫從聊陳芻束萬里哀忭公乘白雲鑒我深衷尚饗

祭陣亡指揮使李如玉文

維萬曆十九年歲次庚寅九月朔越二十日欽差整勅  
靖虜兵糧道陝西苑馬寺少卿兼提刑按察司僉事王

亮謹以牲醴之奠致祭于 明故明威將軍靜虜衛指

揮使李公之靈曰惟靈才兼文武世篤忠貞散貨養士

倚劍譚兵激昂踔絕精悍豪英烏蘭會州切隣虜營惟

爾果敢秣馬巡城三載防禦邊烽不驚賴爾計畫毛幕

知名臨洮被虜遍野羶腥諸關毀拆群堡震驚虔劉旄

倪飲馬長城制府飛檄大帥臨戎爰命我師選甲嬰鋒

爾掌中軍投距請纓星馳河塞狡虜來迎東幟奮鬚揮

刃先登矢無虛發砲駭雷聲渠魁斬馘群虜尸橫醜類

雨泣乞路丐盟胡運未殄滂漲澮盈景古被圍睥睨將

崩誓衆往援火曾西奔借兵順義鐵甲萬群鏖戰及晡



勝負未分固厚孱卒棄甲移屯將纛被砍元戎喪魂爾  
不轉瞬矢盡砲陰手提利刃剗刈若神刀推力竭箭血  
滿襟群醜叢集割臂洞心虜寧粉碎魄貫秋旻直指論  
功錄爾戰勲 天子曰忠陞賚優綸死雖可憫節俠彰  
聞戰陣能勇孝道所敦食不避難乃稱蓋臣余忝監司  
才劣數屯痛爾捐生感爾成仁薄陳絮酒哭奠河濱人  
孰無死草木同湮惟公正氣千禩共論九原有知慷慨  
驥雲為厲殺賊長報國恩尚饗

祭都督東瀛張公文

維萬曆十有九年歲次辛卯四月朔越十二日丁未

欽差整飭靖虜兵糧道陝西苑馬寺少卿兼按察司僉  
事眷生王亮謹以牲醴之奠遣官致祭于 明故大都  
太親翁東瀛張老先生之靈曰惟靈忠貞繩武韜畧殊  
常虬髯虎視鐵面剛腸發跡海嶠敷歷四方奠安閩粵  
廓清羅旁八蠻來威 天子曰良寵以蟒服錫之  
龍章金吾廕襲玉帶輝煌完名全節歸老錦堂頃者醜  
虜敢以跳梁 帝詢耆舊用靖朔方繡衣推轂惟公少  
雙大星忽墜騎箕帝鄉呼嗚哀哉亮緣世誼近締姻盟  
聞翁仙逝有淚如傾奔馳塞上執紼無從南向 梓踊遙  
奠一觥惟靈在天鑒此微誠嗚呼哀哉尚饗



祭賜谷方伯伯父文

維萬曆二十有八年歲次庚子五月癸卯越二十有九日辛未陝西苑馬寺卿蕙按察司僉事宗姪亮謹以剛鬣柔毛之奠致祭于明故少方伯賜翁伯父大人之靈曰惟靈派分江左台嶺名宗墨池是宅甲于甌東世表清德聿振儒風通天達地學博文雄蚤授魏科夾持沈東致觸分宜十載家食島夷弗靖凌轢傳烽捐貲數萬營築雙城宗族妥安海氣底寧兩臺薦剝喜動宸衷玉音獎諭桑梓崢嶸權相去位始就禮闈奪魁宰邑藩三吳菁莪造士赤幟脩兵直道不阿再忤江陵秋風解

海氣疑是海氣

綬滄浪濯纓片金修學施粥振窮開徑結客孔尊不空蹈道依仁揮毫游藝細行必矜大閑益樹壽躋望九黃髮兒齒玉樹盈堦青衿接武宜享期頤以彰殊德天不憖遺帝鄉騎鶴嗚呼哀哉亮也宗盟子姪久沐教思暮春拜謁鶴步康如違顏兩月忽聞訃音臨風悲慟淚江云薄陳牲醴蕪詞寫哀公神在天翻然其來尚饗

祭鴻臚寺卿王太初年兄文

維萬曆二十六年歲次戊戌二月二日丁亥年春生王亮謹以牲芻之奠致祭于明故南京鴻臚寺卿太初年兄王公之靈曰嗚呼哀哉孰謂吾友而止于斯耶余



與吾友生同里開幼同黌序誼則友朋親為兄弟談道  
武陵金蘭臭味兩榜共登雲霄意氣並授巖邑均入瑣  
闥聯章排倭致忤鼎樞君走滇南余麾塞圍萍梗孤踪  
各天萬里君眉堪如余舌尚存知心誰是惟吾二人余  
性迂愚十年不調君善攷藏稍遷清要疏辭開府改授  
留都千秋悟主官拜鴻臚庶幾顯用大展厥謨云胡一  
疾文星殞殂嗚呼哀哉孰謂吾友而止于斯耶余歸自  
秦艤舟盱泗聞君滿秩奏寂燕市日冀良覲一傾肺腑  
忽聞凶問揮淚如泉嗚呼哀哉孰謂吾友而止于斯耶  
吾友飭躬名在天壤文章氣節青史輝光人孰無死君

為不亡年踰五旬不稱為夫玉立三鳳書香克紹大地  
劫灰彭殤罔殊君米禪理仙蛻奚疑海內交游二三兄  
弟如何昊天喪我知己牲芻薄奠侑似蕪詞情之所鍾  
胡能不悲嗚呼哀哉孰謂吾友而止于斯耶尚饗

祭太淑人葉氏文

維萬曆三十年歲次壬寅十二月戊子朔越念有二日  
福建都轉運鹽使司運副使年家晚生王亮謹以剛鬣  
柔毛之奠致祭于 明故誥封太淑人俞老年伯母葉  
氏之靈曰惟靈毓秀名閩克相君子婦道貞嘉名流彤  
史篤生賢嗣魁奪禮闈文雄左馬學紹尼輿敷歷中外



霖雨莊衢揆厥所生成曰母儀嘗能茁芝紫電清雲常  
杜世芳今古今聞松齡望九西媪匹儔龍章疊錫

帝眷逾道 新命令嗣恭藩江右彭蠡敷原來蘇翹首

豈期寶婺遽爾藏輝瑤池迎宴不羨期頤亮獲侍長公

幸聯鳳翅視母猶母永懷弗替况奉賢孫屏翰清塵通

家世誼玉蔭蘭芬聞母仙逝執紼無從遙望靈帷束芻

獻誠臨滬奠有淚滂如母愛猶子庶幾格思嗚呼哀哉

尚饗

祭福建 祖忠懿王文

維萬曆三十年歲次壬寅十二月戊子朔越十有二日

集致祭于 唐故閩粵忠懿

靈曰惟公才兼文武學貫天

才昨土錫爵王封傳至七主

尚書納土守真仁徽欽間姻

帝姬女配皇儲官寓開封會

連宗金陵共族福興漳泉為王

祀崇德象賢暨及于亮忝讀書

垣建白致忤執政出補分

逸騰鳳岐峰龍蜿蜒王

心惕連睠薄陳牲醴聊表



子培我本支億萬年

上海學費瑞依郭氏寫本校





